



Vertical text on a light-colored rectangular label, likely a library or collection stamp. The characters are arranged in a single column and are somewhat faded and difficult to read. The label is positioned on the left side of the page, partially overlapping the main text area.

皇清勅封承德郎戶部江南清吏司主事雪谷府君

行述

嗚呼慟哉先君之凶問奚以忽臨耶

不孝注等

號天搶地莫知所云念

注

等兄弟僅餘四人成

立者三人一歲之間半省膝下半視鄉井今丁

丑夏歸應童子試

注

與五弟

渥

受先君之庭訓

于十一月皆獲青衿孰意喜報未達而訃音忽

降先君已于十二月朔日午時捐館舍嗚呼慟

哉終天之憾百死莫贖即日踉蹌奔赴旅舍苦



塊之次追憶平生和血濡墨雖百不悉一而先
君之嘉言懿行或不至盡泯云先君諱尚鉉字
三立號雪谷爲

至聖六十四代孫世居曲阜明洪武中衍聖公諱克

堅者有子九人帝詢知喜甚撫其肩曰朕有十
子封爲十國卿有九子分爲九門其五門諱希

麟者乃先君所自出也高曾三世皆魯諸生先
祖諱貞堪由廩生考授曲阜世尹值明末寇亂
保障城郭有大功民至今德之今以

覃恩勅贈承德郎戶部江南清吏司主事元配祖母
張氏生先君甫十三齡而見背今

勅贈太安人先君早失恃悽愴獨居不與羣兒戲見
賓客恂恂若愚及讀書穎悟乃過人弱冠入庠
尋食餼每試必第二人勉之不能上懈亦不能
下也時先祖致政家居故吏門生珠履盈門每
文酒之會命先君侍杖屨叔父龍泉令諱尚鈐

寧州佐諱尚鈺新安令諱尚銑時皆垂髫亦列
階墀玉樹成林輝映四座先君尤豪邁能浮大

白能作擘窠大書咄咄逼人一時稱爲佳公子
又善說書每學使者至令諸生會講先君剖晰
經義琅琅可聽瓊橋宿儒莫不嘆折壬子歲膺
選拔其秋又舉於鄉第十人文章奕奕光燄萬
丈人謂山在風氣自先君開之海內學者讀其
制藝稱爲名孝廉不遠千里載酒問字一經指
授者皆博青紫先君愛才若渴誨誘鼓舞別有
秘訣故時雨之化爲甚捷焉癸丑赴南宮不第
旋遭先祖世尹公之喪哀毀餘生酌行古禮觀

者嘖嘖誇爲創見時繼曾祖母王太孺人猶在
堂先君以孫代子養體養志稱孝者內外無間
言未幾先母路安人棄不孝先君悼亡之賦讀

者神傷又一年王太孺人見背麻衣經帶重爲
承重之孤數嘔心血生事都廢再上春官未舊
家道漸以中落有別業在鄒魯之界地名小雪
村湖山最勝先君登其峯俯其谷曰可以老我
矣遂自號雪谷日與二三執友携村醪看閒雲
社鼓里謳油然相習有犯者亦不之較舊所稱

佳公子名孝廉者皆如前身事矣甲子冬

翠華南巡恭祀闕里禮既成宏開

經筵召先君進講易義與堂叔東塘公尚任比肩殿

陛同膺

聖眷立授爲國子博士陪侍

宸遊顧問愍愍知遇之隆漢蘭臺令儔公而後僅見
今日也乙丑歲蒞任太學傳經課藝日昃不遑
而珠桂之憂亦時時仰屋飡苜蓿盤者十有一
年所云雪村之湖山半已屬之他人矣乙亥春

始轉戶曹職司江南田賦版籍如山胥吏如蟻
閱之則目蒿讀之則舌敝判之則腕脫每向人
曰吾但竭吾心力焉耳能免于罪戾則天也今
歲奉

命監督北新倉倉較諸倉爲巨觀度支之繁稽察之
難猶之爲江南司也戴星出入冒暑觸寒雖王
事靡盬而精神不敝體素豐厚又鮮夙疴飲啖
常兼數人凡與公讌年五十者卽坐先君上以
先君髮顏纔如四旬人初度之辰在十月八日

奏伎張筵竟夜歡宴少壯客多離席先君舉巨觥罰之談笑勃勃尚未爲老計詎料爲死計耶嗚呼痛哉先君生于前丁丑年甲子一週蓋已六十一矣爾耆爾艾未爲不壽但以吾父之精神卜之茲不足當彭齡之半奈何遽舍不孝等

而去耶聞屬續之頃恬然如寐蓋棺之時儼然若生古有尸解仙逝者非儒家所宜道而何其跡相似耶或者朝聞夕死考終命之君子固應如是耳獨是先君守拙履素出山十餘年不肯

一謁貴要閉門臥雪炊烟屢斷而抱饑之况未嘗形色乞憐之言未嘗著口長安故人少有知先君之窘者以故未受一人恩獨行踽踽抱介然之節以歿易簣之日囊無一錢瓶無一粟二三叔父皆宦遊四方而貌諸孤稍成立者又越在千里是則尤可傷者也幸季父謁選來都與先君聯榻數月備極墳箠之樂新安之檄旣下先君快甚方爲之述祖德講吏治警欵未絕而雙目遽瞑嗚呼慟哉使非季父視含斂治棺衾

接弔賙之客不愈重藐諸孤之罪哉先君子康熙二十七年遇

單恩勅封將仕佐郎國子監博士今三十六年再遇
單恩勅封承德郎戶部江南清吏司主事元配先母
路氏

勅封安人故江南崇明縣丞汶上路公諱懋德女亞

配曹氏王氏同邑女男六人長衍派先一年卒

娶候選同知滋陽孫公諱宗女今守節次衍注

庠生娶原任福建福州州同嘉祥曾公諱聞迪

女俱路母出三衍潤業儒娶世襲五經博士同

邑東野公諱沛然女早卒再娶候選州同朱公

諱子英女四衍漢早卒俱曹母出五衍渥庠生

聘太學生同邑顏公諱懋緒女六衍沾幼未聘

俱王母出女二人一適河南鞏縣知縣同邑顏

公諱光昌子庠生紹燧路母出一許雲南永昌

府知府宣化羅公諱綸子又二女俱幼未字

王母出孫男三人興槃興棐長男生今槃承重

興集次男生俱幼未聘孫女二人長男生一次

男生一俱幼未字

不孝注

等匍匐倉遽之際記

憶不詳行文無次惟丐

當代大人先生採擇片言勒貞珉而書汗簡

不孝

注等感且不朽

渥

孤哀子孔衍

注

承重孫興槃濡血謹述

沾

衆孫興

集

賜進士出身

經筵講官戶部左侍郎加一級世年家眷侍生王士

禛頓首填諱



